

Maajip arfineq aappaat 2024

UPA2024/59

**Filmiliortut isiginnaartitsisartullu nunatsinneersut nunarsuatta sinnerani filmiliaminnik filmilianiluunniit peqataaffigisaminnik takutitsisoqassatillugu peqataanissamut qanoq tapersorsorneqarsinnaanerat pillugu apeqquteqaat aallaavigalugu oqallisissiaq**  
(Siunnersuuteqartoq, Peter Olsen, Inuit Ataqatigiit)

Siumuminngaanniit Inuit Ataqatigiinneersup, Peter Olsenip, oqallisissiatut siunnersuuteqarneranut qujavugut.

Siumuminngaanniit Nunatsinni eqqumiitsuliornerup silarsuaani inerisaajuarnissamut peqataarusuttarnerput oqaatigissavara.

Ukiuni arlaqartuni eqqumiitsuliornerup silarsuaa inerisarneqartuartarsimavoq. Ungalu killissimavugut allaat ukioq kingulleq filmiliortarnermut inatsisisamik Naalakkersuisut saqqummiissasut, tassanilu sukumiisorujussuarnik Naalakkersuisut suliaqartussatut inassuteqaateqarluni.

Qujanartorujussuuvoq inuiaqatigiinni eqqumiitsuliornerup qanoq pingaartiginera paasineqaraluttualermat. Eqqumiitsuliornerummi pinikut imaluunniit massakkoqqissaaq pisut immaqaluunniimmik takorluukkersaarutit assigiinngitsorpassuartigut kusanartuliatut, tusarnaagassaappat, assilissanik aalasuliaappat, titartagaappata il.il. iluseqartarput.

Takorluussallugu nuna eqqumiitsuliornerup sulianik soqanngitsoq uummatikkut oqimaapporluunniit. Ilami piitsuunassaqaaq. Ilutsit suulluunniit takorluukkaminngaanneersarput, isigisagut sanaajusut tamaavimmik takorluukkaninngaanniit ilusilersorneqarlutik naammassisarput. Isigisagullu naapertorlugin qarasarput immersorneqartapoq. Ittangasunit, qalipaatissaaleqisuniit kusanartorsuarnit naammaannartunut. Tamattalu immikkut nuannarisaqartarpugut, taamaammallu eqqumiitsuliortut assigiinngitsorpassuusarmata qujanartaqaaq.

Aamma ukiuni kingullerni ilikkraluttualerparput eqqumiitsuliortut inuit pingaaruteqarluinnartuusut, illersugassat, tanngassimaarutissat, tapersorsortuagassallu. Kisianni aamma nunani allani saqqumilaartitassat. Sooq? Nunatta nittarsaanneqarneranut Nunarput sinnerlugu saqqummiisartuummata. Ataatsimoortitsisuummata, uagut tamatta sinnerluta nunatsinnik nittarsaassisut. Taamak iliorneq nunamut aningaasaliisartuummat, annertoorujussuanngorsinnaasoq. Filmi isiginnaaraanni filmiliortut pingaartutut inissinneqartarput, oqaluttualiorqoq amerlasuutigut aamma inuk allaasarpoq, filmimi inuttaasut

pingaarluinnartarput, filmiliaritittunut pikkorissaasut aamma annertuumik suliaqartarput, atisaliortut, taniisut, nujalerisut, isikkivigisassanik marsertut, taakkununnga tamanut ataqtigiissaarisut, ila sulisorpassuaqarfiusarpoq tamanna. Naggatigisarpaa filmiliami inuttaasoq imaluunniit inuttaasut filmip kiinarilertarai. Taakku atorlugit filmi nittarsaannejartarluni. Nunaqqateqarpugut filmiornerup silarsuaani Nunani allaniikkaangami ilisarineqartalernikoq. Tamanna angusaq annertoorujussuovoq. Pissutissaqanngilagullu isiginngitsuusaassallugu. Uagununa Nunatsinni tusaamasavissortagut tapersorsorneq nalugigut. Inuttut ataasiakkaannguatut isigiinnartarpagut, tapersorsornagit. Ataasiakkaannguit kisimik tapersersuisarlutik. Tamannalu allanngortariaqvassisporpoq. Nunap tusaamasanngortut aammalu pikkorilluinnartut aningaasaliiffittut isignerusariaqalivippai. Taamaattumillu ataqqinaammik tunillugit, sutigut tamatigut tapersorsorlugit.

Ukiuni kingullerni qujanaqaaq nunaqqatigut nunanit allanit filmiliarerusunneqartalermata, inuttaasutut. Allaammi tusaamasarsuarnik filmiliaqateqarlutik pisalerput. Assaa torrak. Kalaalerlu ilikkaruni.

Taakku filmiliaritittartut periarfissaat, sinaakkusersornissaat, eriaginissaat aammalu tapersorsorneqarnissaat qujanaqaaq Naalakkersuisunit maanna suliarineqarmat. Pissusissamisooqaarlu nunanut allanut, allamiut filmiliaannut peqataasimatillugit, ammaanersiorernut allanullu qaaqqusaanerinni, inatsisisami immikkut kontoqalernissaat ilanngullugu suliarineqarniarmat.

Peter Olsen, illit maani inersuarmi eqqumiitsuliortortatta atugaannik pitsanngorsajuarusunnerit qujanartaqaaq. Amerlasutigummi suli sinaakkusigassanik ulikkaarpugut. Eqqumiitsuliornermi ataasiinnartut isigisinnaanngilarput, amerlarsoorpassuarnik eqimattanik imaqarpoq.

Taamaammat oqaluuserisassamut pingaaruteqartumut qujanaq. Aammalu Naalakkersuisut akissuteqaataannut ersarissaasumut qujanaq, tassami takutippaat oqaluuserisassanngortitap qulequtarisaanik suliaqartoqartoq, taannalu pissangalluta qilanaarlatalu utaqqimaaginnassavarput.

Qujanaq,

Najaaraq Møller  
Siumut